

L'aranciu di Rivela

‘Nta lu me paisi, a Rivela, nnì la cchiù bella conca di la Sicilia, un pedi d'aranciu lamintannusi dici: « Mamma mia chi casdu chi fa! Nun ci la fazzu cchiù a respirari, mi manca lu sciatu, senza tecchia d'acqua stai divintannu siccu e dipirutu, comu a fari pi campari? Comu la fari la zagara l'annu chi veni? C'avissuru a diri l'amici mè, ca sugnu vecchiu e nun sacciu cchiù fari sciuri? Ma taliannumi 'ntunnu, vidu ca l'atri aranci si lamentanu vidè. Nun c'è 'na foglia ca si movi! Tutti li tirreni su arsi, Ma chi 'sta succidennu? Di stu passu mancu 'n'aranciu pozzu fari.

Si mi vidi lu me patruni, ca sugnu accusi malandatu, nun ci stà nenti a tagliarimi e siminari citrola. Iu vulissi sciurì, vulissi fari lu fruttu, vulissi fari cuntenti lu me patruni e faricci vidiri ca ancora sugnu un pedi d'aranciu capaci a fari li megliu aranci di la zona, ma si mi nun mi duna tecchia d'acqua, comu fazzu a campari. Iu sugnu di la “Castiddana” e sugnu lu megliu, lu cchiù sapurusu, lu cchiù grossu e mi sentu di stari 'mprima fila, davanti a tutti.

Mi chiamu “Washington Navel” e mi vantu di essiri rivilisi, mi misiru lu marchiu, sugnu “DOP” sugnu “RIBERELLA”. E pirchè sugnu accusi 'mportanti vogliu fari lu me duviri. Anchi 'st'annu vogliu fari lu megliu fruttu. Speru sulu ca lu Signuri senti 'sti paroli e m'aiuta ». Tuttu 'nzemmula, 'na foglia si cumincià a cataminari, po, l'atri si cataminavanu vidè Tutti l'arbuli cu ddi fogli ca si cataminavanu pariva ca 'ntisiru la prighiera e ognunu cuntenti e felici

salutava a l'atru, dicennu: «Curaggiu sta chiuvennu-sta chiuvennu ».

« Cumincià a chioviri, ognunu di natri piglià respiru, li tirreni si vagnaru tutti, chi gioia chi si siminà campagna-campagna.

L'annata fu bella ricca e accusi l'anni appressu. Lu Signuri fici la Grazia a la nostra Rivela bella e nun fici moriri l'arancia “RIBERELLA” ».

2010 Giuseppe Cardella